



Inkhawmpui inbuatsaihna a vawrtawp thleng chho mek Pandal peihfel tēp tawh; department hotute an phūr

Mizoram pum huapa February 14-17, 2019 chhunga neih tur, Mizoram Ṭhalai Kristian Pawl inkhawmpui inbuatsaihna chuan a vawrtawp a thleng chho mek a; mi 9000 len theihna tur inkhawmpui pandal pawh a nih dan tur anga peihfel tēp a ni ta.

Pandal sakna tur hian mau pum 5000 bawr vel hman a nih tawh thu, Pandal Committee-te chuan sawiin, “Hriat theih chinah rawnāl pum 4000 leh vairua pum 1000 vel kan hmang tawh a ni,” an ti a; dawhsàn tih loh tih tur tam zawk chu peihfel thawkhat a nih tawh thu an sawi.

Pandal Committee sum hman tura ruahman (budget) zāt chu cheng nuai 14 vel a nih lain, tun dinhmunah cheng nuai 13 vel hmanral a nih tawh tih, Pandal Committee hruaitute chuan sawiin, “Kan budget hrim hrim chu kan hmang zo thuak a ni tawh mai. Mahse, inkhawmpui zawh lamah sum hmuh lēt tur a awm nual kan beisei,” an ti.

Inkhawmpui dāwl tura Organising Committee leh an hnuai sub-committee péng hrang hrang inbuatsaihna a vawrtawp a thlen chhoh mek lai hian, Tlabunga Sorkar department hrang hrang hotute pawhin inkhawmpui dāwl turin phūr taka an inbuatsaih mek thu an sawi.

Tlabung SDO (C) Pi V. Lalmuanpui MCS chuan, inkhawmpui dāwl turin Organising Committee-ten theitawp an chhuah bakah, khawtlang mipui an tanguar ṭha hle nia a hriat thu sawiin, “A phūr awm ka ti. Tin, hneh takin kan thlen ngei ka beisei.” a ti a; Tlabung khawpuiin Zoram pum huap inkhawmpui lian a dāwl tur chu thil ṭha leh chhinchhiahtlak tak nia a hriat thu a sawi.

PWD (EE) Pu Vanlalmuana Fanai pawhin, MTKP inkhawmpui chu nghahlelhawm a tih thu sawiin, “Inkhawmpui kan thleng tur hi làwmawm ka ti a, a phūr awm pawh ka ti tawh khawp mai.” a ti a; mikhual pawh a ṭul zat thlen a inhuam thu leh, tun dinhmunah mi 50 thleng turin inbuatsaih rih mah se, a ṭuldan azira a aia tam thlen pawh a inhuam thu a sawi.

Inkhawmpui chhungin Tlabungah a awm a inrin thu Pu Muana chuan sawiin, thil pawimawha zin chhuah thut a ngai a nih loh chuan, MTKP inkhawmpui hunah Tlabunga awm ngei a tum thu a sawi.

Tlabung DFO Pu Lalṭanpuia Pachau chuan, Tlabunga MTKP inkhawmpui nghah a ni tur chu làwmawm a tih thu leh, mikhual thleng tura phūr taka a inbuatsaih thu sawiin, “Mikhual thleng turin rilru leh tih tak zetin kan lo inbuatsaih ve a ni.” a ti a; tun dinhmunah mikhual an thlen theih tur zāt zawh la ni chia lo mah se, a tam thei ang ber thleng turin theitawpin an inbuatsaih mek tih a sawi.

Inkhawmpui chu Mizoram pum huap tur ni mah se, Tlabung khawpuiin hneh taka a thlen theih lohna chhan tur a awm lo tih Pu Ṭpa chuan sawiin, “Keini aia khaw tē pawhin an dāwl theih chuan, hneh taka kan thlen theih lohna chhan tur awmin ka hre lo a ni,” a ti a; mipui ṭanrualna leh inpumkhatna chu chhuanawm a tih thu a sawi baw.

PHE SDO Pu Zoramliana pawhin, Tlabunga MTKP inkhawmpui nghah a ni tur chu ṭha a tih thu leh, inbuatsaihna kalpui a nih dan pawh fakawm a tih thu sawiin, “Organising Committee an tanguar ṭhahnem an ngai takzetin ka hria. Anni zarah leh khawtlang mipui ṭanrualna zarah hneh tak leh ṭha takin inkhawmpui kan dāwl theih ka ring ṭat a ni,” a ti a; mikhual 50-60 vel thlen a inhuam thu leh, mipuiten inkhawmpui chhunga mamawh khawp tui an dawn theih nan department-in theitawp an chhuah tur thu a sawi.

Tlabung SDAO Pu C Malsawmkima chuan, Tlabungah inkhawmpui nghah a nih dawn avangin, quarters thawmṭhatna tur a dil thu leh, cheng nuai khat vel an hmuh thu sawiin, “Mimal tak pawhin ka phūr khawp mai. Department building pawh a remchan dan ang angin mikhual thlenna turin kan ruahman fel tawh a ni,” a ti.

Mikhual pawh a tam thei ang ber thleng tura a inbuatsaih thu, Pu Makima chuan sawiin, “Min rawn pan nghal chat tur hmehhriat leh ṭhianṭhate an awm nual tawh a, anni tih loh mi dang 20 chuang thleng turin ka inbuatsaih baw a ni,” a ti a; inkhawmpui pandal sak mek pawh a tlawh tawh thu leh, a sakna chu hmun remchang tak a nih thu a sawi.

Usher-te pual training

Tun thla ni 15 hian, MTKP inkhâwmpui huna mikhualte lo chhàwn tur, usher-te pualin ni khat awh training buatsaih a ni dawn.

He thu buatsaih lai thleng hian, Kohhran hrang hrang aṅga usher atana ruatte pual training neihna hmun tur tihchian a la ni lo va; he huna usher-te hriat tur thil ùl apiang sawifiah tur leh, zirtirna pe tur pawh ruat fel a nih tawh thu, Ushering sub-committee hruaitute hnen aṅgin dawn a ni.

Pandal satute hâw

MTKP inkhâwmpui pandal satu, state páwn aṅga chah luh mi 13-te chu an hna an zawh fel hnuin, thla khat chuang an awmna Tlabung an chhuahsan.

Inkhâwmpui pandal satu, hlawn neia rawihte hi eirawng bawltu tiamin an vaiin mi 14 an ni a, anmahni chhawr nan a vaiin ₹3,40,000 bawr vel sènal a ni.

Promotional video siam

MTKP inkhâwmpuia kal tura sàwmna leh inkhâwmpui chungchang tihlarna tur video, Mizoram hmun hrang hranga mite thlir theih tura zau zawka thehdarh tur - promotional video chu a buaipuitu Information and Publicity sub-committee-ten an buatsaih mek.

Information and Publicity sub-committee hruaitute chuan, inkhâwmpui puala promotion video pualin shooting an nei mek tih an sawi a, rokhawlhna lian tham a awm a nih loh chuan karleh lamah a nih dan tur a nih fel hman an beisei tih an sawi.

Ṭhutthleng tuamna tur thleng

Pandal chhunga ṭhutthleng siam te khuhna tur ṭhelrèt chu hun eng emaw chen kawng laka a thang khawtlai hnuin, nilaini khan Tlabungah phurh thlen a ni.

Ṭhutthleng khuhna tur ṭhelrèt phurh thlen a nih avang hian, pandal hnâ pawh tun aia a sâwt zawk rin a ni.

Health & Sanitation sub-committee-ten Khaw ṭhenawma khawtlang hruaitute an kâwm

Tlabung khuain fâina lama tun aia hmá a sâwn theih dan tur leh, MTKP inkhâwmpui neih hunah khaw chhung hmun hrang hrang a fâi leh zual theihna tura thawhho dan tur relin, Health & Sanitation sub-committee-ten tun hnai khan Tlabung chhehvela khawtlang hruaitute an kâwm.

Fâina chungchanga ṭanrual dan tur sawihona hunah hian Health & Sanitation sub-committee hruaitute chuan, MTKP inkhâwmpui hunah ram chhung hmun hrang hrang aṅgin mikhual ṭhahnem tak an kalkhawm dawn tih sawiin, Tlabung khua a fâi loh chuan mualphona lian tak a tling thei dawn niin an sawi a, “Kan zavaia kan ṭanho a ngai. Fâina kawngah tun ai hian mimal tinin hmasâwn kan tum a pawimawh a ni,” an ti a; Tlabung chhehvel aṅga khawtlang hruaitu kalkhâwmte chu tun aia fâi pawimawhna inzirtir kawngah nasa leh zuala ṭan la turin an chah a ni.

Hetih lai hian, pandal bul hmun remchangah Health & Sanitation hmalaknain inthiarna 3 leh zunram thiarna 30 sak belh mek a ni a; heng bakah hian inthiarna leh zunram thiarna eng emaw zat a awm sa bawk.

Health & Sanitation sub-committee-te chuan, inthiarna an sak mek te chu mi thilphal ṭhenkhatten a sakna tur hmanraw ṭhenkhat an tumsak tih sawiin, “Kan mamawh hriaa phal taka min petu PHE SDO Pu Zoramliana chungah kan lâwm takzet a ni,” an ti a; inthiarna sak thar te chu thianglim taka vawnfâi a pawimawh dawn niin an sawi.

Organising Committee hruaituten Tualchhunga Kohhran hrang hrang tlawh tum

February 14–17, 2019-a Mizoram Ṭhalai Kristian Pawl inkhâwmpui neih turah, lungrual taka inkhâwmpui dâwl a nih theih nan Inkhâwmpui Organising Committee hruaituten tualchhunga Kohhran hrang hrang an tlawh dawn.

Organising Committee hruaitute chuan, inkhâwmpui a hnaih tawh avangin Kohhran hrang hrangte inpumkhatna vawn nun a pawimawh nia an hriat thu sawiin, “Inkhâwmpui hneh taka kan dâwl theih nan, inlungrualna kan neihna hi tihnggeh leh zual a pawimawh a, hei bakah hian hmalak dan tlangpui leh tun dinhmuna kan thlen chin kan inhriatpawh a ngai a ni,” an ti a, January 13, 2019 (Pathianni) vawin hian Kohhran hrang hrangah insem darha he mi puala hun hman an tum thu an sawi.

Ruahmanna duan lâwk ang chuan, tualchhunga Kohhran 15-ah Organising Committee hruaitute hi insem darhin hun an hmang dawn a ni.

Chhungkaw tin inbuatsaih dan video buatsaih

Reception sub-committee bul tumin, inkhâwmpui dâwl tura chungkaw hrang hrang inpuahchah dan, a lem nena thlir theih turin buatsaih mek a ni.

MTKP inkhâwmpui atana chungkaw hrang hrang inbuatsaih dan te chu a lem nena thlir theih turin, Reception sub-committee-ten an buatsaih mek a, shooting pawh zawh fel tawh niin, video chùl màmm mek a ni.

Hetih lai hian, ṬKP unit tin hnenah MTKP inkhâwmpuia kal tur zât theh lut tura ngenna thawnchhuah ni mah se, chhàna a luh ṭhat loh avangin, pre-registration atan tun thla ni 20 thleng hun pawh sei a ni.

MTKP inkhâwmpui a va hnai ta em

Kum 2016 khan Lawngtlai khawpuiah MTKP Inkhâwmpui kan lo thleng ve tawh a. Khang hunlai ka ngaihtuah khan Organsing Committee-a kan hruaitute inpêkna kha a ropui hlein ka hria a ni. Nupui fanaute pawh ngaihsak tha hman lo khawpin MTKP Inkhâwmpui dawn hnai thla 5 vel aţang phei kha chuan, **nupui fanau an nei lo em ni aw** tih theih tur khawpin **Krista leh Kohhran tan** tiin MTKP Inkhâwmpui inbuatsaihna min kalpui a, hun tha tak kan hmang thei a nih kha.

MTKP Inkhâwmpui khawpuiah khan Lawngtlai khawpui chhunga Kohhran hrang hrangten min phurpui em em mai a. Hnatlang min lo thawhpui a, mikhual thlengin min thlenpui baw a, Kohhran inpumkhatna tha tak min neihtir baw a ni. Khang mikhual zozai kha Lawngtlai khawpui chhunga Baptist Kohhran-te khan kan thleng zo lo em ni? Kohhran dang ina mikhual dah chu a fuh dawn em ni? ti tawk an awm nual mai. Lawngtlai khawpui chhunga BCM chhungkuate khan MTKP inkhâwmpui chhim tura lo kal zawng zawngte kha Kohhran dang ina thleng loin, kan lo mikhual vek thei a ni. Mahse, kha inkhâwmpui kha BCM tan chauh ni lo, Lawngtlai khawpui tan malsawmna ropui takrawn thlentua nih miau avangin, Lawngtlai mipuite'n thlen kha kan inchuh a ni deuh berin ka hria a ni. Kha kha Kohhrana thalaite Inpumkhatna tha tak min neihtir a, a lawmawm ka ti tak zet a ni.

Chhungkaw hrang hrang inbuatsaihna a ropui tak zet a. Darthlalang pakhat chauh nei thin te pawhin mikhualte inenna tur an inchan lo vang tih hlauin, an lei belh baw a. Toilet-ah harsatna kan nei palh ang e, tih hlau tak tak chhungkaw tam takin, pakhat aia tam an nei baw a. Keimahnitawkah inbuatsaihna tha thei ang berin kan nei ve hlawm a ni a. Palai lo kalte beisei erawh kan pha lo khawp ang tih a chiang reng mai. A chhan chu, engkim mai kha hnawhsarum /hmanhmawh thila ti vek kan nih baw a. Mahse, eng mah sêlna awm lova inkhâwmpui hlawk tak kan hmang thei kha a lawmawm tak zet a ni.

Inkhâwmpui hlawhtlinna pakhat chu kan usher te kha an ni tih phat rual a ni lo ve. MTKP inkhâwmpui 2016-a kan usher thenkhatte chu chaw ei mumal lovin, an duty hnehsawh takin an ti thei a. Tu mah phunnawi an awm lo va, an hlim hmel khan pandal pan min tichawkawm tak zet a nih kha. Kha tiang chiah khan tum tum MTKP inkhâwmpui 2019-a kan usher turte hi in ni thei tih hai rual a ni lo ve. Inkhawmpui palaite'n 'usher-te'n min ngaizawng a nih hi maw' ti thei tur khawpin tan han la se, inkhâwmpui hlawhtling tak a ni kan ti thei ngei dawn e. Tin, kan MTKP

□ RBT. ELVIS LALTHANGZUALA
MTKP Executive Committee member

hruaitu hluiten inkhâwmpui hi min lo hmanpui leh ngeiin a rinawm a, chumi hunah pawh chuan thutna chungchangah te pawh han duhsak bik ila, a va lawmawm dawn em. Usher-te hmelthatna hi an vun rawngah ni lovin, nui hmel pu reng usher-ten inkhâwmpui hahdam takin min thlenpui thei a ni. Chuvangin, usher-ten kan pawimawhna kan hriat a ngai tak zet a ni.

Kumin inkhâwmpui hian Programme Co-ordinator an awm leh dawn a. Usher-te nen thawhhona tha tak kan nei a ngai hle dawn a ni. MTKP inkhâwmpui khawpuiah khan Pu T.Lahlimpuia (tunah chuan Upa a ni ta) MTKP Asst. Secretary nen khan kan ni a. Pandal hnungah green room-ah kan awm ve deuh reng baw a. Chanvo nei turte reng reng kha tawngtaina kan lo neihsak thin a ni. Keimahnitawh reng kha a buaithlakna chen a awm avangin usher zinga hotu deuh (Kum upa deuh)te hrilhin kan awm loh pawhin tawngtaina lo neihsak turin kan hrilh hria a, anni pawhin tawngtaina an lo neihsak baw thin a. Khang kha chanvo neite tan a phurawm em em mai a, chuvangin kumin inkhâwmpui pawh hian chhunzawm atan a tha hlein ka hre baw a. Usher-te leh Programme Co-ordinator-te kan tanrual a ngai tak zet a, green room-ah duty awm reng baw se, a tha hle dawn a ni.

Organsing Committee leh sub-committee hrang hrang thawhhona nei that a ngai hle baw. Inkhâwmpui hnukung ber kha a sawi loh thei lo va. MTKP inkhâwmpui 2016, Lawngtlai pawh khan Organsing Committee leh sub-committee-te thawhhona a tha hle mai a. Sub-committee lamin Organsing thu an ngáchang thiam em em baw a. Chu mai chu ni lovin, sub-committee thu pawh Organsing Committee thu an ngaipawimawh thiam baw a ni. A pawimawh ber pakhat chu Organsing Committee emaw sub-committee pawh ni se kan thil tih tur hrang hrang ah tchilhtu an awm a ngai a ni. Chu tiang a nih loh chuan hmalak a har em em mai a, a tchilhtu an lo awmin member-te pawh thu mai mai lova, theitawp kan chhuah ve a ngai a. Kan thiam loh thil tam tak a awm ang, mahse intawiam zel ila, chu chuan nasa takin hna a tisawt a, hmalak pawh a nuam em em baw a ni. Kan thiamthil chauh ti turin inbuatsaih lo ila, kan thiam loh mi dangin an lo tih pawhin tawiam ve turin inbuatsaih zel ila. Chu chuan inkhâwmpui inbuatsaihnaah pawh inpawhna tha a thlen ngeiin ka ring tlat a ni. *(Phêk 4-naah zawm a ni)*

Inkhâwmpui T-Shirt siam hmasak a zawh avanga siam belh te chu khaw hrang hrangah thawn chhuah mek a ni.

EDITORIAL BOARD

Editor:

Lalrinawma Sailo
Ph: 9862934002

Assistant Editors

Lp Vanlalliana
Ph: 8974655474
Vanlalhriatpuia
Ph: 9485052547

Members

Hmingthansangi
Ph: 9862683058
T. Lalremsanga
Ph: 9862979378
P. Vanlalnghaka
Ph: 8414052126

EDITORIAL:

A hun a thleng dawn ta

Inkhâwmpui laiin bulletin hi tihchhuah tum a ni a; inkhâwmpui hmain tum khat dang kan la tichhuak hmanin a rinawm. Tun issue hi inkhâwmpui hmaa bulletin kan tihchhuah hnuhnung ber dawttu a ni tawh dawn a ni.

Inkhâwmpui dâwl tur hian tute tan pawh inbuatsaih a ngai theuh a, kan chungkaw lu tihaitu tam tak hian chungkaw dang pawh na takin a fan ve tho tih kan hriat theuh a tha awm e. Inbuatsaih ve ngai miah lo tura chungkaw thenkhat kan ngaihna hian a lang lo lamah mi thenkhat a tihnuat fo niin a lang a, a pawi hle.

Inkhâwmpui dâwl tur hian chungkaw tin inbuatsaih a ngaih avangin, tute pawh min awk kual vek a; inthiarna kan sak belh lai hian kan in ațanga kâwi eng emaw zatah chuan pindan an zauh belh tih hre reng ila, tuizem kan hun belh laiin veng danga chungkaw thenkhat

chuan inthiarna pindan thar an sual chhuak ve bawk tih kan hriat a tha awm e.

Heti lai hian, hah leh buai taka kan inbuatsaihna hi kan ngaihtuahnain a thir tawp chin tur a ni lo va. He inkhâwmpui dâwl tura kan inbuatsaihna zara kan neih thar tam tak hi a hlut leh hlâwkna tela chhawr țangkai zuitu turte chu keimahni tho kan ni tih kan hriat nawn fo a thain a rinawm a; chungkaw tana rotling tur kan neih belh tam tak hi nakina kan lâwmna thlentu tur a la ni zawk dawn a ni.

Tun dinhmuna chungkaw tin inbuatsaihna kalpui dan hian, inkhâwmpui nghahhlel a tizual a; khawtlangah titi dang a leng ta lo emaw tih mai tura inkhâwmpui huhangin min chiah zawp te hi nakina sawi nuam kan la tih fo tur a ni a; kan hmaah ni tam tak inherchhuak tur awm tawh lo mah se, hun kan neihchhun țangkai taka hman i tum zel ang u.

(Phêk 2-naa article chhunzawmna)

Publicity hi a pawimawh khawp mai : MTKP inkhâwmpui 2016, Lawngtlaiah khan theitawp chhuahin publicity lamah țan kan la hlawm a. Ka hriat reng chu hei hi a ni. Tuna Mizoram Journalists' Association kan President Pu Zonunsanga (Zonet zing daifim) hian "Mizorama țhalai inkhâwmpui awm tawh zawng zawngah publicity in nei tha ber' min ti ve hial a ni. Kan hmalakna kawng hrang hrang te hi a lian emaw a tē emaw mipui hriata kan tlángzarh zel hi a pawimawh a, mipuia awareness pakhat a ni. Chuvangin, publicity-ah hian insúm lo hram hram teh u.

Tin, MTKP inkhâwmpui Countdown kha ni 48 buatsaih a ni a. Organising Committee leh sub committee hrang hrang hmalâkna te (thil dang hrang hrang te pawh) countdown-ah khan kan tãrlang thin a. Chu chuan member-teah awareness nasa takin a lo nei reng mai bawk a. TKP member-te'n an lo hlut hle a, inkhâwmpui an kal châkna chhan pakhat pawh niin ka hre bawk. TKP member 30 dawn khan hmaichhanah MTKP countdown avangin inkhâwmpui kal min tichâk a, kan lo kal a ni, tiin min chibai nghe nghe a ni. Tunah hian countdown pawh

buatsaih a ni zel a, ni tin chhiar theih turin țan la thar leh ta ila, a va tha dawn em ve aw.

Ziah tur a tam tak a awm a, kan ziaak vek séng si lo va. A tawp berah chuan 'mikhualte chung a that chhuah' hi a pawimawh khawp mai. Mizoram țhalai Kristian Pawl member ni lo, delegates leh delegates choir te eng emaw zat an lo kal dawn a. Heng mite chungah hian special treatment lo pêk theih hi a fuh viau ang le. TKP member-te erawh chu kan inkhâwmpui tur a nih miao avangin tlangnêl takin kan awm thei dawn a. Kohran dang țhalai lo kalte lo duat thiam a pawimawh hle ang. An thlenna tur thleng pawha special deuh / pandal hnaih deuh te pawh ni thei se a va tha leh zual dawn em. Tin, MTKP inkhâwmpui 2019 hi Tlabung khuain kan thleng dawn a ni, tih hi kan rilru-ah awm reng se, chu chuan inpumkhatna tha tak min neihtir se. Pathian thlarau thianghlim kaihhruaina nen inbuatsaihna kalpui zel ang u. Kan thupui tur 'Pathian Hmangaihna' hian min phuarkhâwm tlat se, chu hmangaihna chu keimahni leh keimahni inkarah lo piang hmasain, palai lo kal zawng zawngte hnenah kan theihna sângber inhmangaih lan chhuahtir turin i inbuatsaih theuh ang u.